



Broj/ Број : 02/2-50-1-13-4-12/07

Sarajevo/ Сарајево : 28.06.2007. godine

ZAPISNIK

4. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 20.06.2007. godine

Četvrtu sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH sazvala je predsjedavajuća Komisije Alma Čolo.

Sjednici Komisije za vanjsku i trgovinsku politiku, carine, saobraćaj i komunikacije Doma naroda, u svojstvu članova Komisije, prisustvovali su: Alma Čolo, Adem Ibrahimpašić, Slobodan Šaraba, Rudo Vidović, Branko Zrno, te Sonja Abdulovski – pripravnik u Parlamentarnoj skupštini Bosne i Hercegovine.

Odsustvo je opravdala Dušanka Majkić.

Sjednici je također prisustvovao i predstavnik Vanjskotrговinske komore Bosne i Hercegovine, Momir Tošić.

Sjednici su, u svojstvu predlagača, prisustvovali: Radomir Bogdanović iz Ministarstva vanjskih poslova Bosne i Hercegovine, Ismet Šečić i Mustafa Kovačević iz Ministarstva komunikacija i transporta Bosne i Hercegovine, Lejla Solunović iz Ministarstva sigurnosti Bosne i Hercegovine, te Sabrija Šerifović iz Ministarstva vanjske trgovine i ekonomskih odnosa Bosne i Hercegovine.

Nakon što je konstatovano da postoji kvorum, predložen je sljedeći

DNEVNI RED

1. Usvajanje Zapisnika 3. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH;
2. Prijedlog zakona o izmjeni Zakona o konkurenciji Bosne i Hercegovine – prvo čitanje;
3. Davanje saglasnosti za ratifikaciju Sporazuma između Bosne i Hercegovine i Sjevernoatlanske ugovorne organizacije (NATO) o sigurnosti informacija;
4. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Hrvatske o saradnji u nadzoru državne granice;

5. Davanje saglasnosti za ratifikaciju Sporazuma između Vijeća ministara Bosne i Hercegovine i Vijeća ministara Srbije i Crne Gore o vraćanju i prihvaćanju lica koja ne ispunjavaju, ili više ne ispunjavaju uslove za ulazak ili boravak na teritoriji druge države;
6. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Slovenije o saradnji na polju odbrane;
7. Davanje saglasnosti za ratifikaciju Sporazuma o vojnom grantu između Vijeća ministara Bosne i Hercegovine i Vlade Republike Turske i Implementacioni protokol koji se odnosi na finansijsku pomoć između Ministarstva odbrane Bosne i Hercegovine i Generalštaba Republike Turske;
8. Davanje saglasnosti za ratifikaciju Osnovnog ugovora između Bosne i Hercegovine i Svete Stolice i Dodatni protokol na Osnovni ugovor;
9. Davanje saglasnosti za ratifikaciju Konvencije za objedinjavanje određenih propisa u međunarodnom vazdušnom prevozu, Doc. 9740 – Montreal, 28.05.1999. godine;
10. Davanje saglasnosti za ratifikaciju Sporazuma o uspostavljanju željezničke mreže velikih mogućnosti u jugoistočnoj Evropi;
11. Davanje saglasnosti za ratifikaciju Privremenog ugovora o slobodnoj trgovini između Vijeća ministara Bosne i Hercegovine i Misije privremene uprave Ujedinjenih nacija na Kosovu;
12. Tekuća pitanja.

Dnevni red je jednoglasno usvojen.

Ad.1. Usvajanje Zapisnika 3. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH;

Zapisnik 3. sjednice Komisije za vanjsku i trgovinsku politiku, carine, saobraćaj i komunikacije Doma naroda PSBiH jednoglasno je usvojen.

Ad.2. Prijedlog zakona o izmjeni Zakona o konkurenciji Bosne i Hercegovine – prvo čitanje

Uvodnu napomenu o Zakonu o izmjeni zakona o konkurenciji Bosne i Hercegovine dala je predsjedavajuća Komisije, Alma Čolo.

Predstavnički dom Parlamentarne skupštine BiH, koji se pojavljuje u ulozi predlagača Zakona pred Domom naroda i nadležnom Komisijom, usvojio je na svojoj 8. sjednici održanoj 26.04.2007. godine, Prijedlog zakona o izmjeni Zakona o konkurenciji Bosne i Hercegovine, čiji je predlagač bio poslanik Milorad Živković. Izmjenama navedenog Zakona, došlo bi do smanjenja roka, sa šest na tri mjeseca, u kojem Konkurencijsko vijeće mora donijeti konačnu odluku nakon pokretanja postupka.

Komisija za vanjsku i trgovinsku politiku, carine, saobraćaj i komunikacije Doma naroda razmatrala je, u skladu sa odredbama člana 98. stav (1) Poslovnika Doma naroda principe predloženog Zakona. U skladu sa odredbama člana 98. stav (2) Poslovnika Doma naroda, Komisija je, u ovoj fazi, dužna od Direkcije za evropske integracije BiH dobiti mišljenje o usklađenosti prijedloga zakona sa zakonodavstvom Evropske unije. Direkcija je dostavila svoje Mišljenje o Prijedlogu zakona o izmjeni Zakona o konkurenciji Bosne i Hercegovine 19.06.2007. godine, u kojem se iznosi da se Uredbom 1/2003, koja reguliše uspostavu nacionalnih organa za konkurenciju, postupak primjene konkurentskog prava EU, postupak istrage, inspekcije, te saradnje između Evropske komisije i nacionalnih nadležnih organa za konkurenciju, ne propisuje rok u kojem su nacionalni organi dužni donijeti konačnu odluku u postupku primjene i zaštite prava tržišnog natjecanja. S obzirom na to, Direkcija za evropske integracije podržava skraćenje roka u kojem je Konkurencijsko vijeće dužno donijeti konačno rješenje u postupku primjene i zaštite pravila tržišne konkurencije.

Članovi Komisije jednoglasno su podržali principe Prijedloga zakona o izmjenama i dopunama Zakona o konkurenciji Bosne i Hercegovine.

- Ad.3. Davanje saglasnosti za ratifikaciju Sporazuma između Bosne i Hercegovine i Sjevernoatlanske ugovorne organizacije (NATO) o sigurnosti informacija;**
- Ad.4. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Hrvatske o saradnji u nadzoru državne granice;**
- Ad.5. Davanje saglasnosti za ratifikaciju Sporazuma između Vijeća ministara Bosne i Hercegovine i Vijeća ministara Srbije i Crne Gore o vraćanju i prihvaćanju lica koja ne ispunjavaju, ili više ne ispunjavaju uslove za ulazak ili boravak na teritoriji druge države;**

Ispred Ministarstva sigurnosti, kao nadležnog, osnovne informacije o Sporazumima, članovima Komisije dala je Lejla Solunović.

Sporazum između Bosne i Hercegovine i Sjevernoatlanske ugovorne organizacije (NATO) o sigurnosti informacija potpisan je 16.03.2007. godine, a radi se o tipskom sporazumu kojim se uređuje čuvanje i sprovođenje mjera zaštite nad informacijama i materijalima, razmjenjivanje informacija i materijala i njihovo korištenje u tačno određene svrhe i na tačno određene načine uz zabranu prenosa informacija, osim kada za to postoji izričito odobrenje druge ugovorne strane.

Sporazum između Vijeća ministara Bosne i Hercegovine i Vlade Republike Hrvatske o saradnji u nadzoru državne granice je prvi bilateralni sporazum takve vrste. Potpisan je 29.03.2007. godine, a zaključen s ciljem očuvanja povoljnog stanja sigurnosti, nadzora državne granice, osiguranja javnog reda, te radi suzbijanja kriminaliteta u pograničnim područjima.

Sporazum između Vijeća ministara Bosne i Hercegovine i Vijeća ministara Srbije i Crne Gore o vraćanju lica koja ne ispunjavaju ili više ne ispunjavaju uslove za ulazak ili boravak na teritoriji druge države, potpisan je 26.05.2004. godine. Glavni motiv zaključenja Sporazuma bio je unapređenje odnosa između zemalja potpisnica u oblasti vraćanja i prihvata lica koja ne ispunjavaju ili više ne ispunjavaju uslove za ulazak ili boravak na teritoriju države druge ugovorne strane, a sve u namjeri da se ilegalne migracije spriječe i suzbiju.

Članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma između Bosne i Hercegovine i Sjevernoatlanske ugovorne organizacije (NATO) o sigurnosti informacija, Sporazuma između Vijeća ministara Bosne i Hercegovine i Vlade Republike Hrvatske o saradnji u nadzoru državne granice, te Sporazuma između Vijeća ministara Bosne i Hercegovine i Vijeća ministara Srbije i Crne Gore o vraćanju lica koja ne ispunjavaju ili više ne ispunjavaju uslove za ulazak ili boravak na teritoriji druge države.

- Ad.6. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Slovenije o saradnji na polju odbrane**

- Ad.7. Davanje saglasnosti za ratifikaciju Sporazuma o vojnom grantu između Vijeća ministara Bosne i Hercegovine i Vlade Republike Turske i Implementacioni protokol koji se odnosi na finansijsku pomoć između Ministarstva odbrane Bosne i Hercegovine i Generalštaba Republike Turske**

Osnovne napomene za oba Sporazuma dao je Radomir Bogdanović iz Ministarstva vanjskih poslova Bosne i Hercegovine.

Sporazum sa Republikom Slovenijom potpisan je 18.12.2006. godine u cilju unapređenja kontakata i međusobnog razumijevanja na polju odbrane u granicama nadležnosti zemalja ugovornica, a u skladu sa principima međunarodnog prava i prakse. Saradnja će se naročito odvijati u oblasti odbrambene sigurnosti i odbrambenog i vojnog zakonodavstva, kontroli naoružanja i razoružanja, vojnoj historiji, publikacijama i muzejima, odbrambenoj industriji i slično, i to sve putem službenih i radnih posjeta, razmjene iskustava među stručnjacima, razmjene posmatrača na vježbama, te putem prisustvovanja seminarima, kursevima i simpozijumima.

Sporazum o vojnom grantu između Vijeća ministara Bosne i Hercegovine i Vlade Republike Turske potvrđuje postojeće prijateljske odnose između dvije zemlje. Iznos granta je 1.105.000 YTL, a biti će isplaćen u protuvrijednosti u US dolarima Ministarstvu odbrane Bosne i Hercegovine. Jedan dio sredstava, tačnije 85.000 YTL će biti iskorišten za pokrivanje troškova osoblja Ministarstva odbrane, koji će posjetiti Tursku, u cilju poboljšanja bilateralnih odnosa, te u ostale

potrebe koje se mogu pojaviti za vrijeme perioda trajanja protokola, dok će 1.020.000 YTL biti obezbijedena u vidu materijala i usluga.

Članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Slovenije o saradnji na polju odbrane i Sporazuma o vojnom grantu između Vijeća ministara Bosne i Hercegovine i Vlade Republike Turske i Implementacioni protokol koji se odnosi na finansijsku pomoć između Ministarstva odbrane Bosne i Hercegovine i Generalštaba Republike Turske.

Ad. 8. Davanje saglasnosti za ratifikaciju Osnovnog ugovora između Bosne i Hercegovine i Svete Stolice i Dodatni protokol na Osnovni ugovor

Gospodin Bogdanović iz Ministarstva vanjskih poslova naglasio je kako je Ugovor potpisan 29.09.2006. godine, kako bi se odredio pravni okvir odnosa između Katoličke crkve i Bosne i Hercegovine. Imajući u vidu viševijekovnu prisutnost Katoličke crkve u Bosni i Hercegovini, kao i veliku ulogu na društvenom, kulturnom i obrazovnom planu, ugovorne strane obavezuju se da će poštivati načela međunarodnog prava, saradivati u brizi za potpun duhovni i materijalni razvoj čovjeka i unapređenje općeg dobra.

Članovi Komisije dali su saglasnost da se Sporazum uputi Domu naroda na davanje saglasnosti za ratifikaciju.

Ad.9. Davanje saglasnosti za ratifikaciju Konvencije za objedinjavanje određenih propisa u međusobnom vazdušnom prevozu, Doc. 9740 Montreal, 28.05.1999. godine

Ad.10. Davanje saglasnosti za ratifikaciju Sporazuma o uspostavljanju željezničke mreže velikih mogućnosti u jugoistočnoj Evropi

O Konvenciji je par uvodnih riječi dao Ismet Šečić iz Ministarstva komunikacija i transporta Bosne i Hercegovine.

Konvencija se primjenjuje na sav međunarodni prevoz putnika, prtljaga i tereta koji se obavlja avionom uz naknadu, te je prošla svu potrebnu proceduru u Predstavničkom domu Parlamentarne skupštine BiH.

Kako je naslasio Mustafa Kovačević iz Ministarstva komunikacija i transporta Bosne i Hercegovine, a u odnosu na Sporazum o uspostavljanju željezničke mreže, datum potpisivanja je 04.05.2006. godine, a osnovni cilj Sporazuma jeste implementacija željezničke mreže velikih mogućnosti u jugoistočnoj Evropi, za putnički, teretni i intremodalni promet koji nudi brže, kvalitetnije i konkurentnije povezivanje željeznicom, uz značajno smanjenje trajanja putovanja između glavnih urbanih i komercijalnih centara.

Član Komisije za vanjsku i trgovinsku politiku, carine, saobraćaj i komunikacije, Adem Ibrahimpašić, postavio je pitanje da li se planira uključivanje i Unske pruge u željezničku mrežu, na što je g. Kovačević odgovorio da, nažalost, to nije moguće, obzirom na veoma loše stanje u kojem se nalazi.

Članovi Komisije su, potom, odlučili predložiti Domu naroda davanje saglasnosti za ratifikaciju Sporazuma.

Ad.11. Davanje saglasnosti za ratifikaciju Privremenog ugovora o slobodnoj trgovini između Vijeća ministara Bosne i Hercegovine i Misije privremene uprave Ujedinjenih nacija na Kosovu

Kao predstavnik predlagača, ispred Ministarstva vanjske trgovine i ekonomskih odnosa, osnovne podatke o Ugovoru dao je Sabrija Šerifović.

Ugovorne strane, u želji da uspostave područje slobodne trgovine, aktivno učestvuju u procesu ekonomskih integracija u jugoistočnoj Evropi, te potvrđujući svoje opredjeljenje za uspostavljanje i održavanje načela tržišne ekonomije, kao i demokratije i ljudskih prava, odlučile su da omoguće slobodan promet za poljoprivredne i industrijske proizvode pobrojane u Glavama 1-97, osim za proizvode navedene u Aneksu I Ugovora. Ugovorne strane obavezale su se da neće jedna

drugoj nametati nove uvozne carine, takse jednakog dejstva kao carine, uvozne takse fiskalne prirode, količinska ograničenja uvoza ili mjere jednakog dejstva.

Slobodan Šaraba, član Komisije, interesovao se kakve je reakcije imala Srbija, odnosno, kakav stav je zauzet iz Srbije vezano za Ugovor između UNMIC-a i Bosne i Hercegovine, te zašto je potreban paraf ministra trgovine i industrije Institucije privremene samouprave na Kosovu.

Gospodin Šerifović je istakao kako Bosna i Hercegovina, niti Kosovo, nisu dužni tražiti mišljenje Srbije, obzirom da se radi o bilateralnom ugovoru, te da je paraf ministra potreban obzirom da, iako UNMIC zaključuje ugovore, Vlada, odnosno Institucija privremene samouprave na Kosovu, ih primjenjuje.

Članovi Komisije odlučili su, sa 4 glasa za i 1 suzdržanim, da predlože Domu naroda davanje saglasnosti za ratifikaciju, uz uslov da se iz teksta Ugovora izbaci paraf ministra trgovine i industrije Institucije privremene samouprave na Kosovu, samim tim što se Ugovor zaključuje na osnovu Rezolucije Vijeća sigurnosti UN 1244 (1999), od 10.06.1999. godine.

Ad.12. Tekuća pitanja

Pod tačkom „Tekuća pitanja“, g. Ibrahimpašić je zamolio da se pokuša dobiti Analiza Uprave za indirektno oporezivanje, koja se odnosi na akcizne robe, obzirom da se radi o veoma dobrom materijalu koji bi trebao biti predmet razmatranja na jednoj od narednih sjednica Komisije.

Privremeni sekretar Komisije

Aida Kreho

Predsjedavajuća Komisije

Alma Čolo